



REPUBLIKA E SHQIPËRISË

ZYRA E INSPEKTORIT TË LARTË TË DREJTËSISË  
KOMITETI I EMËRIMIT DHE VLERËSIMIT TË INSPEKTORËVE

Nr. 1977/ Prot.

Tiranë, më 07.072022

V E N D I M

Nr. 34 datë. 07.072022

**“PËR NDALIMIN E KANDIDIMIT TË Z. SERGJIO MAZREKU NË VENDIN  
VAKANT PËR INSPEKTOR JOMAGJISTRAT, SHPALLUR NGA INSPEKTORI I  
LARTË I DREJTËSISË MË DATË 30.09.2021”**

Komiteti i Emërimit dhe Vlerësimit të Inspektorëve i përbërë nga:

Z. Besnik Maho – Kryetar

Znj. Joana Asimi – Anëtar

Z. Julian Zonja- Anëtar

Asistuar nga Sekretariati teknik i përbërë nga:

Znj. Alma Zili

Znj. Eljona Bylykbashi

Znj. Jetmira Saraçi

Në mbledhjen e datës 07.07.2022, mori në shqyrtim çështjen që i përket:

Kandidatit për inspektor jomagjistrat: Z. Sergio Mazreku

**OBJEKTI:** Urdhërimi i ndalimit të z. Sergio Mazreku, në vendin vakant për inspektor jomagjistrat, të shpallur nga Inspektori i Lartë i Drejtësisë në datën 30.09.2021.

Komiteti pasi u njoh me aktet si dhe bisedoi çështjen në tërësi,

**VËREN:**

**I. Rrethanat e çështjes**

1. Inspektori i Lartë i Drejtësisë, në mbështetje të nenit 209 dhe nenit 211, pika 2, të ligjit nr. 115/2016 "Për organet e qeverisjes së sistemit të drejtësisë", të ndryshuar, pikës 3 dhe 77, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimit të kushteve dhe të

kritereve ligjore, verifikimin e figurës e të pasurisë së kandidatëve jomagjistratë për pozicionin e inspektorit”, urdhrin nr. 7, datë 04.03.2020, të Inspektorit të Lartë të Drejtësisë, "Për miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë", me njoftimin e datës 30.09.2021, në faqen zyrtare ka shpallur procedurën për 9 vende vakante për pozicionin e inspektorit jomagjistrat. Shpallja ka qenë e hapur për 30 ditë, periudhë gjatë së cilës do të administrohet kërkesa e të interesuarve, bashkë me dokumentacionin e renditur në shpallje.

2. Në përfundim të afatit të shpalljes, me urdhrin nr. 142, datë 29.10.2021 “Për fillimin e procedurës së përzgjedhjes së kandidatëve jomagjistratë për pozicionin e Inspektorit pranë Zyrës së Inspektorit të Lartë të Drejtësisë”, të ndryshuar, Inspektori i Lartë i Drejtësisë ka ngritur Komitetin e Emërimit dhe Vlerësimit të Inspektorëve, si organi që do të zhvillojë procedurat përzgjedhëse për plotësimin e vendeve të shpallura.
3. Komiteti i Emërimit dhe Vlerësimit të Inspektorëve, në përfundim të afatit për paraqitjen e aplikimeve për shprehje interesi për kandidim datë 29.10.2021, zhvilloi mbledhjen e parë më datë 08.11.2021, ku vendosi për radhën e shqyrtimit të dosjes që i përket çdo kandidati dhe fillimin e procedurave të verifikimit, vlerësimit, pikëzimit dhe renditjes së kandidatëve që kanë shprehur interes për vendin vakant për Inspektor Jomagjistrat pranë Zyrës së Inspektorit të Lartë të Drejtësisë duke njoftuar në faqen zyrtare në rubrikën “Njoftime”; “Rekrutim Inspektorë Jo-Magjistratë” listën e personave të interesuar për vendin vakant dhe fillimin e shqyrtimit të aplikimeve të kandidatëve të shoqëruara me dokumentet e paraqitura prej tyre, për përmbushjen e kushteve dhe kritereve ligjore të përcaktuara në nenin 209 dhe nenin 211, pika 2 të ligjit nr. 115/2016 "Për organet e qeverisjes së sistemit të drejtësisë", i ndryshuar dhe të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimin të kushteve dhe të kritereve ligjore, verifikimin e figurës e të pasurisë së kandidatëve jomagjistratë për pozicionin e inspektorit”.
4. Z. Sergio Mazreku, si një ndër kandidatët që ka shprehur interesin nëpërmjet kërkesës me nr. 3811 prot., datë 11.10.2021 për vendin vakant të Inspektor Jomagjistrat pranë Zyrës së Inspektorit të Lartë të Drejtësisë, është njoftuar me shkrim për tu paraqitur pranë Zyrës së Inspektorit të Lartë të Drejtësisë, për të vijuar me përmbushjen e procedurave të verifikimit të kandidaturës bazuar në detyrimet ligjore, të përcaktuara nga neni 209, neni 211, pika 2, të ligjit nr.115/2016 "Për organet e qeverisjes së sistemit të drejtësisë", të ndryshuar, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimin të kushteve dhe të kritereve ligjore, verifikimin e figurës e të pasurisë së kandidatëve jomagjistratë për pozicionin e inspektorit", si dhe urdhrin nr. 7, datë 04.03.2020, të Inspektorit të Lartë të Drejtësisë "Për

miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë". Njoftimi me shkrim, i kryer në rrugë elektronike në adresën e deklaruar nga vetë kandidati, gjendet i administruar në dosjen e kandidimit.

5. Në datën 10.11.2021, kandidati Sergjio Mazreku, është paraqitur pranë Zyrës së Inspektorit të Lartë të Drejtësisë dhe është pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të Deklaratës përkatëse, e cila gjendet e administruar në dosjen e kandidimit
6. Në datën 19.11.2021 kandidati Sergjio Mazreku ka depozituar tek sekretariati teknik, formularët e deklarimit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidimit.
7. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, Inspektori i Lartë i Drejtësisë, në mbështetje të nenit 209 dhe nenit 211, pika 2, të ligjit nr. 115/2016 "Për organet e qeverisjes së sistemit të drejtësisë", të ndryshuar, si edhe në zbatim të seksionit A, të Kreut IV, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimit të kushteve dhe të kriterëve ligjore, verifikimin e figurës e të pasurisë së kandidatëve jo magjistratë për pozicionin e inspektorit", me shkresën përcjellëse me nr. 4228 prot. datë 26.11.2021, i ka dërguar Inspektoratit të Lartë të Deklarimit dhe Kontrollit të Pasurisë dhe Konfliktit të Interesit (ILDKPKI), listën e kandidatëve dhe të personave të lidhur me ta, sikurse janë deklaruar prej vetë kandidatëve, që i nënshtrohen procedurës së deklarimit dhe kontrollit të pasurisë, si edhe kopjet e deklaratave të nënshkruara nga secili prej tyre.
8. Inspektori i Lartë i Drejtësisë ka dërguar ILDKPKI-së listën e kandidatëve dhe personave të lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas ligjit nr. 9049 datë 10.04.2003 "Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë", ligjit nr.9367 date 07.04.2005 "Për parandalimin e konfliktit të interesave në ushtrimin e funksioneve publike" dhe ligjit nr. 115/2016 "Për organet e qeverisjes së Sistemit të Drejtësisë", të ndryshuar.
9. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidati Sergjio Mazreku, ku deklarohet se është pajisur me formularët e deklarimit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të

Ilogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

10. Me shkresën nr. 4570/1 prot, datë 24.12.2021, prot ILDKPKI ka informuar Inspektorin e Lartë të Drejtësisë se kandidati Sergjio Mazreku, e ka përmbushur detyrimin për të dorëzuar të plotësuar Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë.
11. ILDKPKI, në zbatim të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisimit të kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", me aktin nr. 658/24 prot., datë 01.02.2022, ka dërguar pranë Zyrës së Inspektorit të Lartë të Drejtësisë, rezultatet e kontrollit të ushtruar për kandidatin Sergjio Mazreku dhe personat e lidhur me të.
12. Gjithashtu, në funksion të ushtrimit të kompetencave të tij për verifikimin e plotësisimit të kushteve dhe kriterëve ligjore të kandidimit, për sa i përket kontrollit të pasurisë, si dhe në zbatim të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisimit të kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", ky institucion kryen verifikime pranë subjekteve publike dhe private që lejon ligji, të të dhënave mbi pasuritë, interesat privatë dhe detyrimet financiare që ekzistojnë në emër dhe për llogari të kandidatit Sergjio Mazreku dhe personave të lidhur me të si dhe administron/analizon të dhënat që dalin nga procesi i verifikimi të kriterit të pasurisë.
13. Për realizimin e veprimeve verifikuese të lidhura me kontrollin e pasurisë së kandidatit Sergjio Mazreku, ILDKPKI-ja me shkresën nr. 658 prot., datë 02.12.2021, i është drejtuar me kërkesa për informacion lidhur me kandidatin Sergjio Mazreku institucioneve: *Banka e Shqipërisë, Banka Raiffeisen sha, Banka Kombëtare Tregtare sha, Banka Intesa Sanpaolo sha, Banka Alpha sha, Banka Tirana sha, Banka e Bashkuar e Shqipërisë sha, Banka ProCredit sha, Banka e Parë e Investimeve sha, Banka Amerikane e Investimeve sha, Banka Credins sha, Banka Union sha, Banka OTP Albania sha, Raiffeisen Leasing sha, Porsche Leasing shpk, RFZ Invest sha, Credins Invest sha, DPSHTRR, Qendra Kombëtare e Biznesit, DPT, ISSH, D.P Detare, ASHK online.*
14. Për verifikimin e kushteve dhe kriterëve ligjore të kandidimit, të përcaktuara në nenin 209, pika 6, germa "a" dhe nenit 211, pika 2, të ligjit nr. 115/2016 "Për organet e qeverisjes së sistemit të drejtësisë", të ndryshuar, si edhe në zbatim të seksionit C, të Kreut IV, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisimit të kushteve dhe te kriterëve

ligjore, verifikimin e figurës e të pasurisë së kandidatëve jo magjistratë për pozicionin e inspektorit", kandidati Sergjio Mazreku ka depozituar diplomën nr.7666, datë 20.01.2003 e arsimit të lartë lëshuar nga Fakulteti i Drejtësisë, Universiteti i Tiranës, ku vërtetohet se ka marrë titullin "Jurist" si dhe Diplomën Master i Shkencave Civile dhe Tregtare, me nr.15, datë 19.12.2014, lëshuar nga Akademia Profesionale e Biznesit.

15. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e integritetit të kandidatit Sergjio Mazreku, në zbatim të nenit 209, pika 6, germa "b", të ligjit nr. 115/2016 "Për organet e qeverisjes së sistemit të drejtësisë", Inspektori i Lartë i Drejtësisë i është drejtuar me kërkesë për informacion Drejtorisë së Sigurisë së Informacionit të Klasifikuar (*shkresa nr. 4268 prot, datë 02.12.2021*), Shërbimit Informativ të Shtetit (*shkresa nr. 4263 prot, datë 02.12.2021*), Agjencisë së Inteligjencës dhe Sigurisë së Mbrojtjes (*shkresa nr. 4265 prot, datë 02.12.2021*) dhe Shërbimit për Çështjet e Brendshme dhe Ankesat pranë Ministrisë së Brendshme (*shkresa nr.4269 prot, datë 02.12.2021*).
16. Drejtoria e Sigurisë së Informacionit të Klasifikuar, Shërbimi për Çështjet e Brendshme dhe Ankesat pranë Ministrisë së Brendshme, Shërbimit Informativ të Shtetit dhe Agjencisë së Inteligjencës dhe Sigurisë së Mbrojtjes kanë dërguar përgjigjet e tyre, përkatësisht (*me shkresën nr.28 prot., datë 06.01.2022, shkresën nr. 4620/2 prot., date 28.12.2021, shkresën nr.6711 /17 prot., datë 16.12.2021 dhe shkresën nr.1157 prot., datë 10.12.2021*).
17. Në mbështetje të nenit 209, pika 6, germave "b" dhe "d", të ligjit nr. 115/2016 "Për organet e qeverisjes së sistemit të drejtësisë", të ndryshuar, me shkresën me nr. 4264 prot., datë 02.12.2021 është kërkuar informacion që lidhet me integritetin e secilit prej kandidatëve pranë Prokurorisë së Posaçme kundër Korrupsionit dhe Krimin të Organizuar, me shkresën nr. 4260 prot., datë 02.12.2021 Prokurorisë të Përgjithshme dhe me shkresën nr. 4261 prot., datë 02.12.2021 Drejtorisë të Përgjithshme të Burgjeve, lidhur me:
  - Çdo të dhënë apo indicie të ardhur nga agjencitë ligjzbatuese për fillimin e hetimeve në lidhje me dyshimet e ngritura në kuptimin të ligjit material dhe procedural mbi të cilin ushtron veprimtarinë ky institucion kushtetues;
  - Kopje të dokumentacionit që përmban të dhëna në rastet e identifikimit të kandidatit jo magjistratë në kontakte me persona të papërshtatshëm (anëtarë të organizatave kriminale, persona të dënuar penalisht apo persona të dyshuar për kryerjen e veprave penale), ku përfshihen edhe biseda, foto, vëzhgime takimesh apo kontakte telefonike;

- Nëse janë zhvilluar ndaj tyre procese gjyqësore të karakterit penal, dhe rezultojnë të dënuar, për efekt të gjendjes gjyqësore.

18. Informacioni i kërkuar për sa më sipër, është përcjellë Inspektorit të Lartë të Drejtësisë me shkresën nr. 9874/1 prot., datë 14.12.2021 të Prokurorisë së Posaçme kundër Korrupsionit dhe Krimit të Organizuar, shkresën nr. 13028/1 prot., datë 10.12.2021 të Drejtorisë të Përgjithshme të Burgjeve dhe shkresën nr. 1689/16 prot., datë 14.12.2021 të Prokurorisë të Përgjithshme.
19. Për verifikimin e kushteve dhe kriterëve ligjore të kandidimit, që kanë të bëjnë me përvojën profesionale si "Jurist", jo më pak se pesëmbëdhjetë vite punë në çastin e kandidimit, në zbatim të nenit 209, pika 6, germa "c", të ligjit nr. 115/2016 "Për organet e qeverisjes së sistemit të drejtësisë", Inspektori i Lartë i Drejtësisë i është drejtuar me kërkesë për informacion Institutit të Sigurimeve Shoqërore me shkresën nr. 4259 prot, datë 02.12.2021, në lidhje me periudhën e derdhjes të kontributeve të sigurimeve shoqërore. Instituti i Sigurimeve Shoqërore ka kthyer përgjigje me shkresën nr. 7674/1 prot, datë 13.12.2021 dhe me shkresën nr. 12854/1 prot, datë 16.12.2021
20. Gjithashtu, për këtë rast kandidimi, Inspektori i Lartë i Drejtësisë i është drejtuar me kërkesë për informacion Dhomës Kombëtare të Avokatisë me nr. 4266, datë 02.12.2021. Kërkesa është bërë në mbështetje të nenit 209, pika 6, germa "ç", e ligjit nr. 115/2016 "Për organet e qeverisjes së sistemit të drejtësisë", të ndryshuar dhe seksionit C të kreut IV, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisë të kushteve dhe të kriterëve ligjore, verifikimin e figurës e të pasurisë së kandidatëve jomagjistratë, për pozicionin e inspektorit", duke kërkuar nëse kandidati, në mënyrë aktive, ka ushtruar profesionin e avokatit të paktën në dy vitet e fundit.
- Dhoma Kombëtare e Avokatisë është përgjigjur me shkresën nr. 333 prot., datë 22.12.2021 (informacion i cili është administruar në dosjen e kandidatit).
21. Në vijim të përgjigjes nr. 333 prot., datë 22.12.2021 të Dhomës Kombëtare të Avokatisë, Inspektori i Lartë i Drejtësisë i u drejtua me shkresën nr. 206 prot., datë 26.01.2022 QKB-së, për informacion shtesë në lidhje me faktin nëse Sergjio Mazreku është subjekt aktiv në ushtrimin e profesionit të avokatit. Qendra Kombëtare e Biznesit me shkresën nr. 2735/1 prot., datë 02.02.2022 dërgoi informacion të detajuar në lidhje me NIPT, emrin e subjektit tregtar, datën e regjistrimit dhe çdo të dhënë tjetër që lidhet me emrin e kandidatit Sergjio Mazreku.
22. Lidhur me kriterin e përcaktuar në nenin 209, pika 6, germa "d" të ligjit nr. 115/2016 "Për organet e qeverisjes së sistemit të drejtësisë", të ndryshuar, është dërguar shkresa nr.4261,

datë 02.12.2021 në Drejtorinë e Përgjithshme të Burgjeve, ku është kërkuar informacion nëse kandidati është dënuar më parë me vendim gjyqësor të formës së prerë për kryerjen e një vepre penale. Drejtoria e Përgjithshme e Burgjeve ka kthyer përgjigje pranë Zyrës së Inspektorit të Lartë të Drejtësisë me shkresën nr. 13028/1 prot., datë 10.12.2021.

23. Gjithashtu, lidhur me verifikimin dhe kontrollin e integritetit, në zbatim të nenit 209, pika 6, germa "e", të ligjit nr. 115/2016 "Për organet e qeverisjes së sistemit të drejtësisë", të ndryshuar, dhe pikës 62, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisë së kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", Inspektori i Lartë i Drejtësisë i është drejtuar Autoritetit për Informim mbi Dokumentet e ish - Sigurimit të Shtetit nëse secili kandidat, përfshihet në rastin e posaçëm të nenit 209, pika 6, germa "e", e ligjit nr. 115/2016 "Për organet e qeverisjes së sistemit të drejtësisë", të ndryshuar: "e) ka qenë ose jo anëtar, bashkëpunëtor ose të favorizuar nga ish-Sigurimi i Shtetit para 2 korrikut 1991, apo për ndonjë nga rastet e pikës 2, të nenit 29, të ligjit nr. 45/2015 "Për të drejtën e informimit për dokumentet e ish-sigurimit të shtetit të Republikës Popullore Socialiste të Shqipërisë".

Me shkresën nr. 4262 prot, datë 02.12.2021, Inspektori i Lartë i Drejtësisë, ka dërguar formularin e aplikimit përkatës të plotësuar sipas ligjit nga kandidati i sipërcituar, për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

24. Autoriteti për Informimin mbi Dokumentet e Ish-Sigurimit të Shtetit, me shkresën nr. 1886/4 prot, datë 20.01.2022 ka dërguar pranë Inspektorit të Lartë të Drejtësisë, informacionin, i cili i është bashkëngjitur praktikës së kandidatit (*Vendimi nr.16, datë 17.01.2022* i Autoritetit për Informimin mbi Dokumentet e Ish-Sigurimit të Shtetit).
25. Në vijim të procedurave të verifikimit që lidhet me integritetin e kandidatëve për inspektor jomagjistrat si dhe për të shmangur çdo lloj konflikti interesi që bie ndesh me nenin 209, pika 6, gjerat "dh", "ë" dhe "f" të ligjit nr.115/2016 "Për organet e qeverisjes së sistemit të drejtësisë", është njoftuar zyrtarisht secili kandidat që të plotësojë formularët përkatës që lidhen me:
- mospasjen e funksione politike në administratën publike, ose pozicione drejtuese në parti politike gjatë 10 vjetëve të fundit përpara kandidimit;
  - mosqenien bashkëpunëtorë, informatorë ose agjentë të ndonjë shërbimi sekret;
  - mosqenien anëtarë të organeve drejtuese të ndonjë grupi interesi, të tilla si shoqata ose sindikata etj., në kohën e kandidimit.

Për sa i takon kandidatit Sergjio Mazreku, është paraqitur në ambientet e Zyrës së Inspektorit të Lartë të Drejtësisë dhe ka dorëzuar të plotësuar secilin prej formularëve të mësipërm.

26. Në përfundim të veprimeve dhe procedurave të kontrollit dhe verifikimit, në zbatim të nenit 209 dhe nenit 211, pika 2, të ligjit nr. 115/2016 " Për organet e qeverisjes së sistemit të drejtësisë", të ndryshuar, pikës 27 e vijues, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimin të kushteve dhe të kriterëve ligjore, verifikimin e figurës e të pasurisë së kandidatëve jomagjistratë, për pozicionin e inspektorit", urdhrit nr. 7, datë 04.03.2020, të Inspektorit të Lartë të Drejtësisë, "Për miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë", Komiteti ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm.
27. Në mbështetje të nenit 209 dhe nenit 211, pika 2, të ligjit nr. 115/2016 " Për organet e qeverisjes së sistemit të drejtësisë", të ndryshuar, të C, të Kreut IV vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimin të kushteve dhe të kriterëve ligjore, verifikimin e figurës e të pasurisë së kandidatëve jomagjistratë, për pozicionin e inspektorit", urdhrit nr. 7, datë 04.03.2020, të Inspektorit të Lartë të Drejtësisë, "Për miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë", Kryetari i Komitetit të Emërimit dhe Vlerësimit të Inspektorëve ka thirrur mbledhjen e Komitetit duke njoftuar anëtarët për zhvillimin e saj në datën 06.07.2018, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt shqyrtimin e aplikimit të kandidimit të z.Sergjio Mazreku, për vendin vakant për inspektor jomagjistrat në Zyrën e Inspektorit të Lartë të Drejtësisë.

## **II. Vlerësimi i Komitetit**

28. Komiteti i Emërimit dhe Vlerësimit të Inspektorëve, duke u bazuar në dispozitat ligjore dhe ato nënligjore normative të zbatueshme për çështjen në shqyrtim, si edhe në rrethanat e faktit që rezultojnë nga aktet që përmban dosja e kandidimit, vlerëson se duhet të procedojë me vendim për ndalimin e kandidimit të kandidatit Sergjio Mazreku për vendin vakant për Inspektor jomagjistrat pranë Zyrës së Inspektorit të Lartë të Drejtësisë.
29. Në ligjin nr.115/2016 " Për organet e qeverisjes së sistemit të drejtësisë", të ndryshuar konkretisht në nenin 209, në pikën 6, përcaktohen "Kushtet për inspektor jomagjistrat", si vijon:



6. Kandidatët për inspektorë, të cilët nuk janë magjistratë, duhet të plotësojnë kushtet e mëposhtme:

- a) të jenë shtetas shqiptarë me diplomë të nivelit të dytë në drejtësi dhe me rezultate të larta në studimet universitare;
- b) të kenë integritet të lartë moral dhe përgatitje të lartë profesionale;
- c) në kohën e kandidimit, të kenë përvojë pune si jurist, të paktën 15 vjet;
- ç) në kohën e kandidimit, të mos kenë ushtruar në mënyrë aktive profesionin e avokatit të paktën 2 vitet e fundit;
- d) të mos kenë qenë dënuar më parë me vendim gjyqësor të formës së prerë për kryerjen e nje krimi;
- dh) të mos kenë mbajtur funksione politike në administratën publike, ose pozicione drejtuese në parti politike gjatë 10 vjetëve të fundit përpara kandidimit;
- e) të mos kenë qenë anëtare, bashkëpunëtorë ose të favorizuar nga ish-Sigurimi i Shtetit para 2 korrikut 1991;
- ë) të mos jenë bashkëpunëtorë, Informatorë ose agjentë të ndonjë shërbimi sekret;
- f) të mos jenë anëtarë të organeve drejtuese të ndonjë grupi interesi, të tilla si shoqata ose sindikata etj., në kohën e kandidimit;

30. Përsa i përket procedurës së verifikimit të pasurisë, në përfundim të veprimeve të kontrollit të ushtruar nga ana ILDKPKI-së, në zbatim të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimin të kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", me aktin nr. 658/24 prot., datë 01.02.2022, ka dërguar pranë Inspektorit të Lartë të Drejtësisë, rezultatet e përfundimit të kontrollit të ushtruar për kandidatin Sergio Mazreku dhe personat e lidhur me të.

31. Në përfundim të analizës së hollësishme financiare të kryer mbi bazën e gjetjeve të siguruar nga informacionet e dërguara nga institucione publike dhe subjekte private, lidhur me deklarimin e pasurisë dhe interesave private të kandidatit Sergio Mazreku, ILDKPKI në raportin e paraqitur ka ardhur në përfundimet se:

- a) deklarimi nuk është i saktë në përputhje me ligjin;**
- b) ka mungesë dokumentacioni ligjor për të justifikuar pasurinë;**
- c) ka mosdeklarim të pasurisë;**
- ç) nuk ka kryer deklarim të rremë;
- d) subjekti nuk gjendet në situatën e konfliktit të interesave.

32. Sikurse rezulton nga akti i përfundimit të kontrollit të pasurisë me nr. 658/24 prot., datë 01.02.2022, për kandidatin Sergio Mazreku, gjetjet dhe përfundimet e ILDKPKI-së janë në disfavor të tij, sa i takon plotësimin të kriterit të pasurisë në tre aspekte që lidhen me

deklarimin jo të saktë dhe në përputhje me ligjin, ka mungesë dokumentacioni ligjor për të justifikuar pasurinë si dhe ka mosdeklarim të pasurisë.

33. Bazuar në përgjigjen e dhënë nga ILDKPKI me aktin nr. 658/24 prot., datë 01.02.2022, Komiteti ka vendosur që me aktin nr. 4228/14, datë 23.02.2022, t'i përcillen kandidatit Sergio Mazreku, rezultatet e kontrollit të pasurisë për sa më sipër duke i lënë një afat prej 15 (pesëmbëdhjetë) ditësh për të dhënë sqarime dhe dokumentacion shtesë, me qëllim për të kundërshtuar gjetjet e ILDKPKI. Njoftimi i rezultatit të kontrollit të pasurisë i është njoftuar kandidatit Sergio Mazreku me emailin e datës 23.02.2022 (dokument që administrohet në dosjen e aplikimit të kandidatit).
34. Me shkresën nr. 481/3, datë 04.03.2022, kandidati Sergio Mazreku dorëzoi në Zyrën e Inspektorit të Lartë të Drejtësisë, informacion sqarues në lidhje me të dhënat pronësore që kanë të bëjnë me kriterin e pasurisë, në formën e llogarive bankare, pasurive të luajtshme dhe të paluajtshme të cilat sipas tij janë deklaruar konform ligjit dhe nuk ka asnjë parregullsi si dhe dokumentacionin shoqërues që përbëhet nga kontrata e shitjes nr. 2546 Rep, nr. 476 Kol, datë 26.10.2011, kartelë pronësisë, hartë treguese, certifikatë për vërtetim pronësie që i takon pasurive të verifikuara së bashku me kartelë dhe hartë treguese si dhe nxjerrje llogarie/statement nga Banka Credins.
35. Komiteti pasi ka administruar dokumentacionin e dorëzuar nëpërmjet shkresës nr. 481/3 prot., datë 04.03.2022 nga kandidati Sergio Mazreku, me shkresën nr. 481/7 prot., datë 01.04.2022, iu drejtua sërish ILDKPKI, lidhur me kontrollin e pasurisë dhe interesave private të kandidatit Sergio Mazreku, duke i përcjellë këtij institucioni sqarimet dhe dokumentet shoqëruese të z. Sergio Mazreku sa më sipër.
36. ILDKPKI me shkresën nr.4570/12, datë 22.04.202 ka përcjellë aktin nr.658/25, datë 21.04.2022 mbi përfundimin e kontrollit të pasurisë. Bazuar në aktin 658/25 nr. prot., datë 21.04.2022 ILDKPKI-së, kandidati Sergio Mazreku ka probleme me kriterin e pasurisë në tre aspekte që lidhen me deklarimin jo të saktë dhe në përputhje me ligjin si dhe ka mungesë dokumentacioni për të justifikuar pasurinë si dhe ka mosdeklarim të pasurisë.
37. Për këto arsye, në zbatim të nenit 209 dhe nenit 211, pika 2, të ligjit nr.115/2016 " Për organet e qeverisjes së sistemit të drejtësisë", të ndryshuar, të pikës 54, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisë të kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", urdhrin nr. 7, datë 04.03.2020, të Inspektorit të Lartë të Drejtësisë "Për miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë", Komiteti vjen në përfundimin se kandidati Sergio Mazreku nuk ka "kaluar me sukses procesin e kontrollit

dhe verifikimit të pasurisë së tij personale dhe të familjarëve të tij". **Për rrjedhojë, për sa më sipër, ky kandidat gjendet në kushtet e ndalimit të kandidimit për sa i përket kriterit të verifikimit të pasurisë.**

38. Në lidhje me kushtin e kandidimit të parashikuar nga neni 209, pika 6, germa "a" e ligjit nr. 115/2016, pra që kandidati të "a) të jetë shtetas shqiptar me diplomë të nivelit të dytë në drejtësi dhe me rezultate të larta në studimet universitare;" nga dokumentacioni i shqyrtuar rezulton se kandidati Sergjio Mazreku, ka përfunduar studimet dhe është diplomuar në vitin 2003 si Jurist, në Fakultetin e Drejtësisë, Universiteti i Tiranës. Në zbatim të ligjit nr. 80/2015 "Për arsimin e lartë dhe kërkimin shkencor në institucionet e arsimit të lartë në Republikën e Shqipërisë" ky lloj arsimimi kualifikohet si arsim i lartë juridik, Diplomë e Nivelit të Dytë. Për rrjedhojë kandidati Sergjio Mazreku nuk gjendet në kushtet e ndalimit të kandidimit sipas dispozitave të sipërcituara.
39. Lidhur me kushtin e kandidimit të parashikuar nga pika "b" e pikës 6 të nenit 209 të ligjit nr. 115/2016, pra që kandidatët "b) të kenë integritet të lartë moral dhe përgatitje të lartë profesionale". Nga aktet e administruara në dosjen e aplikimit, si dhe bazuar në rezultatet e arritura nga kandidati gjatë ndjekjes së arsimit të lartë ku ka fituar titullin "Jurist" ashtu edhe në Master Shkencor, kandidati Sergjio Mazreku e plotëson këtë kriter.
40. Lidhur me verifikimin dhe kontrollin e integritetit, kandidati Sergjio Mazreku ka dorëzuar në afat formularin e vetëdeklarimit sipas ligjit nr. 138/2015 "Për garantimin e integritetit të personave që zgjidhen, emërohen ose ushtrojnë funksione publike", të cilin, Inspektori i Lartë i Drejtësisë ia ka përcjellë për verifikim dhe kompetencë sipas ligjit Prokurorisë së Posaçme kundër Korrupsionit dhe Krimin të Organizuar dhe Prokurorisë së Përgjithshme.
41. Në mbështetje të nenit 209, pika 6, germa "b" dhe "d", të ligjit nr. 115/2016 "Për organet e qeverisjes së sistemit të drejtësisë", të ndryshuar, me shkresën me nr. 4264 prot., datë 02.12.2021 është kërkuar informacion që lidhet me integritetin e secilit prej kandidatëve pranë Prokurorisë së Posaçme kundër Korrupsionit dhe Krimin të Organizuar. Me shkresën me nr. 9874/1 prot., datë 14.12.2021, kjo Prokurori ka dërguar informacionin se për z. Sergjio Mazreku, kandidat për pozicionin e inspektorit jomagjistrat, nuk rezulton të jetë regjistruar ndonjë procedim penal.
42. Prokuroria e Përgjithshme, me shkresën nr. 1689/16 prot., datë 14.12.2021, ka dërguar pranë Inspektorit të Lartë të Drejtësisë rezultatet e kontrollit të ushtruar për kandidatin Sergjio Mazreku, duke i bashkëngjitur vendimin e datës 13.12.2021. Prokuroria e Përgjithshme, ka mbajtur qëndrimin se: 5.2.2 "Indicet, të dhënat apo faktet që i atribuohen personit/subjekt të ligjit për dënime penale, masa sigurimi personale, urdhër kërkimi ndërkombëtar apo dëbime nga territori i një shteti janë të domosdoshme ligjërish, pasi vetëm në bazë të tyre mund t'iu kërkohet autoriteteve të huaja policore dhe gjyqësore,

*informacion dhe dokumente nga të cilat mund të paraqiten rrethana që përfshihen brenda sferës së ndalimeve nga ligji 138/2015". 5.3 "të dhënat e deklaruara në formularin e datës 18.11.2021, nga personi/subjekti Sergjio Vili Mazreku, si kandidat jo magjistrat për pozicionin e inspektorit pranë Zyrës të Inspektorit të Lartë të Drejtësisë, janë të njëjta me ato që ky person ka vetëdeklaruar në formularin e datës 24.01.2020 po si kandidat për gjyqtar në Gjykatën Kushtetuese" 5.3.1 "për saktësinë e të dhënave të pasqyruara në Formularin e Vetëdeklarimit datë 24.01.2020, dhe konstatimin nëse rrethanat janë të ndryshme, në bazë të kërkesës të KED me nr. 35 prot., datë 30.01.2020, Prokuroria e Përgjithshme, në zbatim të ligjit 138/2015, ka kryer procesin e verifikimit të thelluar, rezultatet e së cilës janë miratuar me vendimin e datës 02 Qershor 2020. "*

Për arsyet e mësipërme Prokuroria e Përgjithshme, ka dalë në vendimmarrje për mospranimin e verifikimit të të dhënave të pasqyruara në Formularin e Vetëdeklarimit datë 18.11.2021, nga shtetasi Sergjio Mazreku, në vendin vakant për Inspektor jomagjistrat pranë Zyrës së Inspektorit të Lartë të Drejtësisë.

43. Referuar nenit 209, pika 6, germa "b" të ligjit nr. 115/2016, Komiteti vjen në përfundimin se kandidati Sergjio Mazreku krahas plotësimit të saktë formularit të vetëdeklarimit, nuk u vu në dijeni të ndonjë indicieje, të dhëne apo fakteve që i atribuohen këtij kandidati për dënime penale, masa sigurimi personal, urdhër kërkimi ndërkombëtar apo dëbime nga territori i një shteti. Për rrjedhojë, vlerëson se lidhur me këtë kriter, ky kandidat nuk gjendet në kushtet që mund të sjellin ndalimin e kandidimit.
44. Gjithashtu, për të verifikuar çdo të dhënë tjetër që lidhet me integritetin, bazuar në nenin 209, pika 6, germa "b" e ligjit nr. 115/2016, Komiteti verifikoi, nëpërmjet informacionit të sjellë sipas ligjit nga organet kompetente ligjzbatuese si Drejtoria e Sigurimit të Informacionit të Klasifikuar, Shërbimi Informativ i Shtetit, Agjencia e Inteligjencës dhe Sigurisë së Mbrojtjes dhe Shërbimi i Kontrollit të Çështjeve të Brendshme dhe Ankesave pranë Ministrisë së Brendshme, nëse kandidati "ka lidhje ose kontakte të papërshtatshme me personat e përfshirë në krimin e organizuar ose me persona të dyshuar të krimit të organizuar".

Ky verifikim përbën standardin kushtetues dhe ligjor tashmë të vendosur për figurën dhe integritetin e funksionarëve kushtetues të sistemit të drejtësisë, përpara zgjedhjes dhe gjatë ushtrimit të funksionit, pas ndryshimeve të Kushtetutës në vitin 2016, duke pasur parasysh ato të përcaktuara edhe në nenin DH të Aneksit të Kushtetutës, si edhe në ligjet e tjera të nxjerra në pajtim me të, përfshirë ligjin nr. 84/2016 "Për rivlerësimin kalimtar të gjyqtarëve dhe prokurorëve në Republikën e Shqipërisë", pra mbi të njëjtat standard dhe interpretim të këtij kriteri në procesin e rivlerësimit kalimtar të gjyqtarëve dhe prokurorëve.

45. Shërbimi i Kontrollit të Çështjeve të Brendshme dhe Ankesave pranë Ministrisë së Brendshme me shkresën nr.4620/2 prot., date 28.12.2021, ka përcjellë pranë Zyrës së Inspektorit të Lartë të Drejtësisë, informacionin e kërkuar, të cituar më sipër, nga ku rezulton se, në lidhje me kandidatin Sergio Mazreku:

*“a) Nuk figurojnë të evidentuar për veprimtari kriminale, apo të kenë lidhje kontakte të papërshtatshme me persona të përfshirë me krimin e organizuar në ngarkim të z Sergio Mazreku.”*

46. Drejtoria e Sigurimit të Informacionit të Klasifikuar, me shkresën nr.28 prot., datë 06.01.2022, ka përcjellë pranë Inspektorit të Lartë të Drejtësisë informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara më sipër, nga ku rezulton se, në lidhje me kandidatin Sergio Mazreku:

*“a) Nuk disponon të dhëna informacione për përfshirjen në veprimtari që cenojnë sigurinë kombëtare apo aktivitete të kundërligjshme dhe që bien në kundërshtim me kërkesat e nenit 38 të ligjit nr.84/2016 “Për rivlerësimin kalimtar të gjyqtarëve dhe prokurorëve bë Republikën e Shqipërisë dhe pikën 66, geramat a) dhe c) të VKM nr. 536, datë 25.07.2019 “Për krijimin e kushteve për Inspektorin e Lartë të Drejtësisë për verifikimin e plotë të kushteve dhe kriterëve ligjore, verifikimin e figurës dhe të pasurisë të kandidatëve jo magjistratë për pozicionin e inspektorit në ngarkim të z Sergio Mazreku.”.*

47. Shërbimi Informativ i Shtetit, me shkresën nr.6711/17 prot., datë 16.12.2021, ka përcjellë pranë Inspektorit të Lartë të Drejtësisë informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara më sipër, nga ku rezulton se, në lidhje me kandidatin Sergio Mazreku.

*“a) Nuk disponohen të dhëna dhe informacione për përfshirje në veprimtari që cenojnë sigurinë kombëtare, apo aktivitete të kundërligjshme në ngarkim të z Sergio Mazreku.”*

48. Agjencia e Inteligjencës dhe Sigurisë së Mbrojtjes, me shkresën nr.1157 prot., datë 10.12.2021, ka përcjellë pranë Inspektorit të Lartë të Drejtësisë informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara më sipër, nga ku rezulton se, në lidhje me kandidatin Sergio Mazreku:

*“ a) Nuk disponohen të dhëna dhe informacione për përfshirje në veprimtari që cenojnë sigurinë kombëtare, apo aktivitete të kundërligjshme në ngarkim të z Sergio Mazreku.”*

49. Komiteti i Emërimit dhe Vlerësimit të Inspektorëve, bazuar në njohjen dhe shqyrtimin e informacionit të klasifikuar të dërguar nga agjencitë ligjzbatuese, vjen në përfundimin se, edhe për këtë kriter, në zbatim të nenit 209, pika 6, germa "b" të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.
50. Lidhur me kushtin e kandidimit të parashikuar nga nenit 209, pika 6, germa "c" e ligjit nr. 115/2016, pra që *kandidatët "c)* në kohën e kandidimit, të kenë përvojë pune si jurist, të paktën 15 vjet", nga dokumentacioni i shqyrtuar, gjatë procesit të verifikimit rezultoi se kandidati nuk kishte dorëzuar jetëshkrim, vërtetim nga DRSSH apo librezë pune në të cilën të vërtetohej përvoja e tij jo më pak se 15 vite si jurist.
51. Duke qenë se kandidati Sergjio Mazreku nuk kishte depozituar librezë pune në dokumentacionin e dorëzuar, si dhe referuar përgjigjes së Institutit të Sigurimeve Shoqërore me shkresën nr.7674/1, datë 13.12.2021 nga ku rezulton se për kandidatin Sergjio Mazreku janë derdhur kontribute për periudhën Janar 2012- Janar 2020, Komiteti me shkresën nr. 4259/3, datë 24.02.2022 ka vendosur t'i kërkojë kandidatit të paraqesë librezën e punës, duke i lënë një afat prej 15 (pesëmbëdhjetë) ditësh, bazuar në pikën 16, të Kreut III, të vendimit nr. 536, date 25.07.2019, të Këshillit të Ministrave "*Për krijimin e kushteve për Inspektorin e Lartë të Drejtësisë për verifikimin e plotësimit të kushteve dhe të kriterëve ligjore, verifikimin e figurës e të pasurisë së kandidatëve jomagjistratë, për pozicionin e inspektorit*". Njoftimi për përcjelljen e dokumentacionit provues ju njoftua kandidatit Sergjio Mazreku me email datë 24.02.2022 (i cili administrohet në dosjen e aplikimit të kandidatit).
52. Me shkresën nr. 481/5, datë 04.03.2022, kandidati Sergjio Mazreku, dorëzoi dokumente shkresorë, sikurse janë shkresa e vërtetime të lëshuara nga organet kompetente të emërtesës etj., të cilat provojnë faktin se ai ka ushtruar veprimtari profesionale si:
- Ka marrë Licencën me nr. 2061 datë 20.03.2004 për ushtrimin e profesionit të avokatit në Republikën e Shqipërisë;
  - Është regjistruar si person fizik pranë QKB për ushtrimin e profesionit të avokatit me këto të dhëna NUIS (NIPT)- L11628007V në datë 28.04.2011;
  - Vërtetim nga DRSSH, dega Elbasan për pagimin e sigurimeve shoqërore gjatë periudhës Shkurt-Shtator 1996.
53. Lidhur me kushtin e kandidimit të parashikuar në nenin 209, pika 6, germa "c" e ligjit nr. 115/2016, Dhoma Kombëtare të Avokatisë me shkresën 333 prot., datë 22.12.2021, i dërgon informacion ILD-së, nga ku rezulton se: "Sergjio Mazreku, *ka fituar titullin avokat dhe është mbajtës i licencës me nr. 2061, në vitin 2004. Prej këtij viti dhe në vazhdim është në ushtrim të profesionit të avokatit*". Bazuar në dokumentacionin e administruar për sa më sipër, Komiteti konstaton se kandidati Sergjio Mazreku ka ushtruar jo më pak

se 15 vjet veprimtari profesionale si "Jurist". Për rrjedhojë, kandidati nuk gjendet në kushtet e ndalimit të kandidimit sipas kësaj dispozite.

54. Për sa i përket urdhërimeve të nenit 209, pika 6, germa "ç", të ligjit nr. 115/2016 "Për organet e qeverisjes së sistemit të drejtësisë", të ndryshuar dhe seksionit C të kreut IV, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësisë të kushteve dhe të kriterëve ligjore, verifikimin e figurës e të pasurisë së kandidatëve jomagjistratë, për pozicionin e inspektorit", ku kërkohet që kandidati për inspektor jomagjistrat, të mos ketë ushtruar në mënyre aktive, profesionin e avokatit të paktën në dy vitet e fundit. Me shkresën nr. 333, datë 22.12.2021, Dhoma Kombëtare e Avokatisë ka kthyer përgjigje, sipas së cilës rezultojnë se "Sergjio Mazreku, ka fituar titullin avokat dhe është mbajtës i licencës me nr. 2061, në vitin 2004. **Prej këtij viti dhe në vazhdim është në ushtrim të profesionit të avokatit**".
55. Gjithashtu, Qendra Kombëtare e Biznesit me shkresën nr. 2735/1 prot., datë 02.02.2022 informon Inspektorin e Lartë të Drejtësisë se "z. *Sergjio Mazreku, i datëlindjes 13.01.1958, figuron i regjistruar në QKB si person fizik, pajisur me NUIS (NIPT)-L11628007V. Bashkëngjitur shkresës ju vëmë në dispozicion ekstraktin historik të subjektit Sergjio Mazreku, me NUIS (NIPT)- L11628007V*"
56. Në bazë të ekstraktit historik të dërguar nga QKB, rezultojnë se në datë 05.08.2019, subjekti Sergjio Mazreku, me NUIS (NIPT)- L11628007V ka bërë ndryshimin e aktivitetit të tij tregtar nga (Avokati. Tregti rrobash, fustane nusesh), në vetëm "Avokat". **Mbas kësaj datë nuk ka asnjë veprim apo transaksion tjetër në regjistrin tregtar që administron QKB, të natyrës të pezullimit të ushtrimit të profesionit të avokatit apo të mbylljes të ushtrimit të këtij profesioni.**
57. Sa më sipër në lidhje me urdhërimet e nenit 209, pika 6, germa "ç", të ligjit nr. 115/2016 "Për organet e qeverisjes së sistemit të drejtësisë", i ndryshuar, rezultojnë se kandidati Sergjio Mazreku, **nuk plotëson këtë kriter të ligjit pasi ushtron profesionin e avokatit në Republikën e Shqipërisë.**
58. Për verifikimin e kushteve dhe kriterëve të tjera ligjore të kandidimit, në zbatim të nenit 209, pika 6, germa "d", "dh", "e", "ë" dhe "f", të ligjit nr. 115/2016, Komiteti shqyrtoi dokumentacionin e depozituar nga vetë kandidati Sergjio Mazreku, në momentin e kandidimit pranë organit të emërtesës që ka shpallur vendin vakant, si dhe atë të mbërritur nga Drejtoria e Përgjithshme të Burgjeve dhe Autoriteti për Informimin mbi Dokumentet e Ish-Sigurimit të Shtetit.

59. Në nenin 209, pika 6, germa "d", e ligjit nr. 115/2016, si kusht kandidimi përcaktohet që kandidatët "*d*) të mos kenë qenë dënuar më parë me vendim gjyqësor të formës së prerë për kryerjen e një krimi". Nga dokumentacioni i shqyrtuar, përfshirë certifikatën e gjendjes gjyqësore, që është administruar në dosjen e kandidimit, Komiteti konstaton se kandidati Sergjio Mazreku, nuk rezulton të jetë dënuar. Për rrjedhojë kandidati nuk gjendet në kushtet e ndalimit të kandidimit sipas kësaj dispozite.
60. Gjithashtu, lidhur me kriterin e përcaktuar në nenin 209 pika 6, germa "d" të ligjit nr. 115/2016 "Për organet e qeverisjes së sistemit të drejtësisë", Drejtoria e Përgjithshme të Burgjeve me shkresën nr. 13028/1 prot., datë 10.12.2021, jep informacionin se për shtetasin Sergjio Mazreku "*Rezulton se nuk ka shënime në sistem, nuk ka të regjistruar dënime penale të formës së prerë*".
61. Në nenin 209, pika 6, germa "dh" e ligjit nr. 115/2016, si kusht kandidimi përcaktohet që kandidatët "*dh*) të mos kenë mbajtur funksione politike në administratën publike, ose pozicione drejtuese në parti politike gjatë 10 vjetëve të fundit përpara kandidimit". Nga dokumentacioni i shqyrtuar, përfshi këtu dhe formularin e vetëdeklarimit, rezulton se kandidati Sergjio Mazreku, nuk rezulton të ketë mbajtur funksione politike ose pozicione drejtuese në parti politike gjatë 10 vjetëve të fundit përpara kandidimit. Për rrjedhojë kandidati nuk gjendet në kushtet e ndalimit të kandidimit sipas kësaj dispozite.
62. Në vijim të procedurave të verifikimit të integritetit në bazë të nenit 209, pika 6, germa "e", e ligjit nr. 115/2016 "Për organet e qeverisjes së sistemit të drejtësisë", i ndryshuar, kandidati Sergjio Mazreku ka dorëzuar në afat formularin e aplikimit "Për informim përpara emërimit/zgjedhjes në poste të larta" parashikuar në ligjin nr. 45/2015, të cilin, Inspektori i Lartë i Drejtësisë ia ka përcjellë për verifikim dhe kompetencë sipas ligjit Autoritetit për Informimin mbi Dokumentet e Ish-Sigurimit të Shtetit.
63. Bazuar në përgjigjen nr. 1886/4 prot, datë 20.01.2022 të Autoritetit për Informimin mbi Dokumentet e Ish-Sigurimit të Shtetit, është administruar vendimi nr.16, datë 17.01.2022, nga ku rezulton se kandidati Sergjio Mazreku, nuk ka qënë përfshirë për spiunazh apo terrorizëm si dhe nuk ka qënë anëtar, bashkëpunëtor ose i favorizuar nga Sigurimi Shtetit, duke përmbushur në këtë mënyrë kushtet e parashikuara nga ligji nr. 45/2015 për pastërtinë e figurës së funksionarit kushtetues në lidhje me sjelljen dhe veprimtarinë e tij përpara muajit korrik 1991. Për rrjedhojë, lidhur me këtë kriter, në zbatim të nenit 209, pika 6, germa "e" të ligjit nr. 115/2016, ky kandidat nuk gjendet në kushtet që mund të sjellin ndalimin e kandidimit.
64. Në nenin 209, pika 6, germa "ë" e ligjit nr. 115/2016, si kusht kandidimi përcaktohet që kandidatët "*ë*) të deklarojnë se nuk janë bashkëpunëtorë, informatorë ose agjentë të ndonjë shërbimi sekret, në kohën e kandidimit;". Nga dokumentacioni i shqyrtuar, përfshi këtu



dhe formularin e vetëdeklarimit në dosjen e kandidimit, Komiteti konstaton se kandidati Sergjio Mazreku, nuk rezulton të jetë bashkëpunëtor, informator ose agjent i ndonjë shërbimi sekret, në kohën e kandidimit, në kohën e kandidimit. Për rrjedhojë kandidati nuk gjendet në kushtet e ndalimit të kandidimit sipas kësaj dispozite.

65. Në nenin 209, pika 6, germa "f" të ligjit nr. 115/2016, si kusht kandidimi përcaktohet që kandidatët "*f) të mos jenë anëtarë të organeve drejtuese të ndonjë grupi interesi, të tilla si shoqata ose sindikata etj., në kohën e kandidimit.*". Nga dokumentacioni i shqyrtuar, përfshi këtu dhe formularin e vetëdeklarimit, rezulton se kandidati Sergjio Mazreku, nuk rezulton të jetë anëtar i organeve drejtuese të ndonjë grupi interesi, të tilla si shoqata ose sindikata në kohën e kandidimit. Për rrjedhojë kandidati nuk gjendet në kushtet e ndalimit të kandidimit sipas kësaj dispozite.
66. Nisur nga sa analizohet dhe arsyetohet me sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacionin që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për Inspektor jomagjistrat, Komiteti i Emërimit dhe Vlerësimit të Inspektorëve vjen në përfundimin se duhet të vendoset ndalimi i kandidimit të kandidatit Sergjio Mazreku, në vendin vakant për Inspektor jomagjistrat, të shpallur nga Inspektori i Lartë i Drejtësisë në datën 30.09.2021, pasi kandidati nuk plotëson kriterin e pasurisë sipas VKM nr.536/2019 dhe kriterin e përcaktuar në nenin 209, pika 6, germa "ç" e ligjit nr. 115/2016 "Për organet e qeverisjes së sistemit të drejtësisë" të ndryshuar.

#### **PËR KËTO ARSYE:**

Në mbështetje të nenit 209 dhe nenit 211, pika 2, të ligjit nr. 115/2016 "Për organet e qeverisjes së sistemit të drejtësisë" të ndryshuar, pikave 27/b, 28 shkronja a) dhe b), 30, 31, 72, 73, të vendimit nr. 536, datë 25.07.2019, të Këshillit të Ministrave "Për krijimin e kushteve për Inspektorin e Lartë të Drejtësisë për verifikimin e plotësimit të kushteve dhe të kriterëve ligjore, verifikimin e figurës e të pasurisë së kandidatëve jomagjistratë për pozicionin e inspektorit", urdhrin nr. 7, datë 04.03.2020, të Inspektorit të Lartë të Drejtësisë, "Për miratimin e Rregullores "Për procedurën dhe kriteret e vlerësimit, pikëzimit dhe renditjes së kandidatëve jomagjistratë për pozicionin e inspektorit pranë Zyrës së Inspektorit të Lartë të Drejtësisë" Komiteti i Emërimit dhe Vlerësimit të Inspektorëve:

#### **V E N D O S I:**

1. Ndalimin e kandidimit të kandidatit Sergjio Mazreku, në vendin vakant për inspektor jomagjistrat, i shpallur nga Inspektori i Lartë i Drejtësisë në datë 30.09.2021.
2. Ky vendim i njoftohet kandidatit Sergjio Mazreku.

3. Kandidati ka të drejtën e ankimit në gjykatën kompetente, brenda afatit ligjor.
4. Ky vendim publikohet në faqen zyrtare të Inspektorit të Lartë të Drejtësisë.

**KOMITETI I EMËRIMIT DHE VLERËSIMIT TË INSPEKTORËVE**

**ANËTAR**

**Julian Zonja**

**KRYETAR**

**Besnik Maho**

**ANËTAR**

**Joana Asimi**

